

Obakreizstettna Köllagossn.

De Pflostastane rutschn heit Und es san a kane
Leit.

Gregnt hots da Hoiweg dea is noss. Nua do vuan
rennt grad a Hos.

Sunst steh i gaunz allanich do. I drah mi um und
denk ma so.

Wos is do scho gsuffa wuan. Weissn, Rotn und an
Stuam.

Bledilt, Gsunga, gmiatlich gsessn, und a
Brettljausn gessn.

I setz mi hea do auf an Sta. Im Schottn weus jo
Summa wa.

Do hea i d Huafeisn vum Roß. Des is jo... geh hea
ma auf ... sog bloß.

Da Opa mit seina muazdrum Stuatn. Auf sein
Loatawogn in guatn

Huckt a obn und pfeifft si ans. A Burnout kriagt da
Opa kans.

Da Wogn hint is mit Weimba voi. Er sogt ma dass i
aufsteign soi.



**Gaunz obm hot er in letztn Kölla. Da easchte unt
wad a ka Föhla.**

**D Akazie gebn an guatn Schottn. Opa des hob i heit
darotn.**

**Gaunz frisch gweissnt ois via neich. Brrrr und
Stuatn steht sogleich.**

**Beim Gugal schaut de Rutschn ausse Fiad Weimba.
Kumm jetzt gibt's ka Pause.**

**Da Opa richt si d' Stieföfetz, jetzt wird gschauföt
bis zum Letztn**

**Weitraubal wos oberutscht ind Press. In frischn
Most den riach i jetzt.**

**Da Köllazegan steht am Tisch. Wo da opa
driwawischt.**

**A Bratl a koits vu letzta Woch. An Reankn Brot hot
a jetzt brochn.**

**An Paradeisa fia an jedn. A Kramöschmoitz hots a
no gebn.**

**Oba bevua mia jetzta essn. Deafst bua ans
niemois vagessn.**

**Eascht kriagts Ross no ihrign Howan. Und a Deckn
hots scho oman...**



**De Viecha tan uns so vü gem. De vadienan unsan
Segn.**

**S Kreuz mocht er in Richtung Eckn. Duat glei obad
Weingatsteckn.**

Hängt a klanes kruzifix. Und a Weiheba sunst nix.

**I schau zua Tia a liacht a grölles. Und a Mandl
gaunz a schnölles.**

**I daschreck und foah in d Heh, und siach in Lois do
vua mia steh.**

**Da Köllaführer höchstpersönlich. Frogt ob ma
schlecht iss oda ähnlich.**

**Na sog i. Hobt Weimba presst Weu i bin heit, beim
Opa gwest.**